

# «Ils tagls ein schubers»

In resun sin la «Metta da fein» – l'emprima seria da web ficziunala dad RTR

DAVID TRUTTMANN/FMR

■ Darar hai dà ina producziun or da la cuschina da Radiotelevision Svizra Rumantscha (RTR) ch'ha survegni tanta reclama ed in tal program accompagnant ordavant. Ussa è ella online, la «Metta da fein», l'emprima seria da web ficziunala rumantscha. La FMR ha guardà la seria e ristga ina critica, sperond ch'i na dettia betg ina mazzacrada. E tant saja tradì ordavant: I dat a la fin ina mazzacrada en «Metta da fein». Bler sang e ketchup explodi en la bella halla polivalenta da Vrin tar l'elecziun dal «Mister catscha». Ma en sazez n'è quai gnanc in tradiment da menziunar quai ussa en quest artitgel, perquai ch'igl è previsibel bunamain suenter paucas minutas da la seria tge ch'i vegn a schabegiar ed igl è era pauc sorprendent tgi ch'è il «Schläfer». Ma ussa èsi fin cun ils spoilers!

## Cumedia naira e splattermovie

Però tge seria vegn atgnamain servida qua dad RTR, cun quels 300 000–400 000 francs che la SRG SSR ha mess a disposiziun? – Dad ina concorrenza (naziunala) èn numnadamain sortids sco victurs ils dus giuvens reschissurs e sochis Carlo Beer ed Urs Berlinger. Quai ch'ìls dus absolvents da la scola da film da Turitg han realisà ussa cun «Metta da fein» è in mix tranter ina cumedia naira austriaca ed in splattermovie. I cribla da muments ed inscenaziuns grotescas e da la persiflascha dad in mintgadi rumantsch e grischun. E latiers vegn fatg diever da mintga singul clisché per via – da brissa-



Placats prominents en il Grischun: Il start da l'emprima seria da web ficziunala ha RTR accompagnà cun ina gronda campagna da program accompagnant e da reclama – sco p.ex. qua a la staziun da Cuira.

FOTO DAVID TRUTTMANN

gos e chatschaders, da la gritta sin il luf enfin l'augsegner (forsa) pervers ed ils purs ch'èn ora sin ils raps.

## Dal hippi al plevon

Il privel da crudar en in teateret da vischnanca, quel exista en «Metta da fein» – i dat però figuras che procuran per risadas gist er grazia a las prestaziuns dals acturs. P.ex. David Flepp sco guru-hippi-veterinari è prezios («Sgola, sgola – ti eis libra!»). Da vesair Roman Weishaupt en la rolla dad in plevon liberal è ina truvaglia. E purtada vegn la seria sa chapescha dal policist

Aldo (René Schmoz), in sheriff macho-provinzial ch'ha gugent sia «raspada», senza però far sez gronds sigls tar la lavur.

## Placativ e caricà

Tuttas figuras en «Metta da fein» restan però plattas. I na dat nagin che procura per ina surpraisa, gnanc il «Schläfer». Las figuras vegnan bain skizzadas e preschentadas, na survegnan però ni profunditad ni preistorgia. Ed ellas na fan er betg tras aifer las 80 minutas da la seria x-in svilup. Tut resta sco adina, plitost placativ e caricà. Gnanc tar la baraccada dad Aldo e Ga-

bi (Marietta Jemmi), la guardia-chatscha engiadinaisa, na siglian naginas sbrinzlas.

## L'amur per il grotesc

Musicalmain e visualmain è la seria producida ordvart professional, cun grond'amur per il detagl. Per part datti bellezza quadraschas da las muntognas e da la provinza lumneziana. Ils cliffhangers a la fin da mintga episodio èn grategiads – ins sto simplamain guardar vinvant. Ed er il umor dals dus auturs e reschissurs vala aur ed è probabel la gronda qualitad da «Metta da fein». L'amur da Berlinger e Beer per la grotasca e lur plaschair da rumper l'idilla cun umor nairischem, quai renda frestga l'entira chista. Quella grotasca emprova la seria era da trasportar cun quadraschas lungas, tschertgond lien il witz. Deplorablamain daventan tras quai intginas passaschas plitost pesantas e pauc sorprendentas. Tut para dad ir en in tact regular. Per fortuna datti tranteren in u l'auter dialog setg, sco p.ex. la constataziun laconica dal guru-hippi-veterinari, vesend las chommas tagliadas dad in lama: «Ils tagls ein schubers.»

Tge resta? – Atgnamain resta pauc en testa suenter avair guardà la seria. I resta però il sentiment dad esser vegni divertì durant 80 minutas, dad avair fatg diversas risadas, d'avair vis finalmain ina giada ina cumedia naira rumantscha che culminescha la fin en in splattermovie. E quai è ina prestaziun.

La seria *Metta da fein* (4 x 20 min) è da vesair dapi questa fin d'emna sin [www.rtr.ch](http://www.rtr.ch) ubain sin la plattafurma Play Suisse.